

第十六冊

門閥  
風俗

姓名  
方言

稱謂

清稗類鈔

商務印書館發行

清稗類鈔

門閥類目錄

族長

連江黃氏六世同居

九經孟家

崑山鉅族

萬氏門風之雄

西林覺羅仕宦之盛

范氏四世顯貴

陳氏一門九列

安溪李氏功業

杭州宦族

杭州徐氏

父子祖孫宰相

兄弟子姪宰相

世爲河督

父子同官

頁

曾李一門節鉞

端方家世

彭氏甲科傳家

同祖兄弟三十一人應試

兄弟翰林

裴氏兩世以贊郎致貴

阮文達門聯

珠子王家

金頭朱家

吳氏各房輪值典當

史可法孫

宋王之後

江焦之後

熊賜履無子

福康安後嗣不振

海蘭察有子

和坤門楣衰替

一〇

一〇

一一

一一

一二

一二

一二

一三

一三

一四

一四

一五

一五

一五

一六

一六

一七

# 清稗類鈔

杭縣 徐珂 仲可

## 門閥類

### 族長

合族之法。因其地而異。山西尉遲氏。自唐至今。未嘗分家。其法於族中選有才行者爲族長。有事則至宗祠理之。有公案。有鈐記。凡族中事。皆聽其一言爲進止。無敢違。繼任者卽由前族長自舉。他人不得干預。旣舉。定三日受事。又蘇州范氏。爲文正公後裔。巨族也。向推一人爲族長。設公案。聽斷一族之事。有鈐記。死或他故。則更以鈐記授後任。交替時必著公服。一若官之受代者然。

### 連江黃氏六世同居

黃成富者。連江農家子也。六世同居。男女六十餘。雍睦無間言。子弟各執其業。每出作田間。衆婦俱往。留一婦視家。臥兒於筐。飢則乳之。不問爲誰兒也。懸衣於桁。出則脫之。入則衣之。垢則澣之。不問爲誰衣也。遇客至。供具飲食。家長主

之家中不聞有爭言。

### 九經孟家

山東章邱有九經孟家者。其家法。祖遺產業。不得分析。每添男丁。由族長月致所應得之錢。婦喪夫者。必先問其志願。若欲嫁。則備奩具一份。由族中爲擇大家嫁之。若經三年不嫁。則贈以鴉片烟具一份。吸否亦聽之。月致金如故。男子令識字。讀四書。取粗通文字。不令作帖括。惟許武試。然亦得武舉而止。倘必欲仕宦者。亦聽其自由。惟不得分金。族人有小過。由族斷之。犯大惡。卽令出族而聽官處置。

### 崑山鉅族

崑山鉅族。明時推戴葉王。顧李五姓。迨入本朝。則徐氏兄弟貴。而前此五姓少衰矣。邑人因爲之語曰。帶葉黃瓜李。不如一個大荸薺。以帶音同戴。黃音近王。瓜音轉顧。薺音近徐故也。

### 萬氏門風之雄

萬履安名泰。充宗季野父也。舉明崇禎丙子鄉試。入國朝。服道士服。隱居不出。文行爲通國模楷。有子八人。師事餘姚黃梨洲。各執一藝。務令精熟。梨洲嘗歎曰。浙東門風之雄。莫過萬氏。八子名斯年、斯程、斯禎、斯昌、斯選、斯大、斯構、斯同。世稱萬氏八龍。斯同名最高。崑山徐氏之讀禮通考。華亭王氏之橫雲史稿。皆其所著。而爲徐王所攘也。其解經論史之書。未經刊布者尙多。斯選字公擇。沈潛理窟。師法梨洲。兼紹藏山陽明之緒。年六十卒。梨洲哭之慟。曰。甬上從遊。能振蕺山之絕學。公擇一人而已。斯大字充宗。志操介持。遂於春秋之禮學。明張忠烈公煌言及父執陸符死。充宗皆持服葬之。李杲堂鄴嗣嘗言。說經無雙。名擅八龍。昔有慈明。今見充宗。斯構字允誠。明劉宗周殉難。其遺書皆允誠爲之藏寄。全謝山稱爲藏山之功臣。斯年字祖繩。少從錢忠節公學。俄逢喪亂。劍戰弧矢。遍於城市。讀書不輟。旣而避地屢遷。家具盡棄。悉載書卷以行。晚歲。主教桃源書院。隨學者資性。分經授之。由是來就者日衆。祖繩於二黨皆恩有意。忠節死海外。收其文集。爲之立嗣。斯程立學攻醫。當黃宗炎行刑日。父泰與高斗

魁等畫策。潛載死囚代之。負宗炎冥行十里者。斯程也。斯禎字正符。孝友性成。精研周易。旁治毛詩春秋。書宗北海。詩有風人之致。斯昌負才早歿。

西林覺羅仕宦之盛

滿洲西林覺羅氏。自步軍統領鄂拜曾官祭酒後。鄂拜姪鄂爾奇姪孫鄂容安。元孫潤祥。皆相繼長成均。潤祥字補臣。有四世司成詩卷。西林氏自從龍入關。重侯累相。武達文通。在豐沛故家中。遺澤最遠。第一輩。福倫。一等男爵。鐵寶。副都統兼一等男爵。鄂爾泰。大學士一等襄勤伯。第二輩。天保。襲一等男。烏金。內閣學士禮部侍郎。鄂實。副都統。征葉爾羌陣亡。諡果壯。鄂容安。進士官至兩江總督。征伊犁陣亡。諡剛烈。第三輩。鄂岳。散秩大臣一等伯。鄂津。伊犁領隊大臣。其餘中外一二品官。不可勝紀。如後之盛京將軍都興阿。察哈爾都統三等男爵勇毅公西凌阿。江寧將軍穆騰阿。皆其族也。

范氏四世顯貴

漢軍范文肅公文程。首建入關之議。贊襄洪業。爵爲宗臣。列祖呼爲老祕書。文

肅子爲忠貞公承謨。尙書承勳。侍郎承烈。孫爲總督時崇。侍郎時紀。尙書時綬。都統時捷。曾孫爲尙書宜恆。皆著名績。

### 陳氏一門九列

陳文簡公娶長洲宋文恪公女。康熙間。文簡由吏部侍郎巡撫廣西。賓客入賀。宋夫人獨愀然不悅者累日。曰。一門羣從。咸列清華。我夫子乃出爲粗官。令我慚顏於娣姒矣。蓋其時陳氏一門。宗伯清恪公。司空文和公。丙齋司寇。匏廬少宗伯。皆官九列。而夫人之姊妹夫太倉王相國。海寧顧侍郎。合肥李宮詹。長洲繆宮贊。亦同時以巍科清秩。比踵朝端。故夫人云然也。

### 安溪李氏功業

國初。功業之隆。莫若安溪李氏。而族中尤以李文貞公光地爲最。文貞初生。族人卽以偉器期之。然忌者亦時時有毀聲。族中某。與劇盜李金梁通。密糾黨與。據祠宇爲巢穴。且時與文貞父兆慶爲難。金梁以距城遠。四路通達。便於遁徙。欣然從之。盜入李祠後。知爲族某所爲。因集族衆善爲辭謝。時文貞方九齡。隨

其父立稠人中。金梁適見之。趨摩其頂而愛之。笑謂兆慶曰。我遷此。本無去意。今觀此孩好骨相。倘讓。我便率衆去。永不相犯。兆慶訝其言不類。正詫異間。而族衆乃懇兆慶許之。曰。舍一兒以保一族。卽此子他日貴達。仍當復歸生我。奈何不通權以濟變乎。兆慶無計。姑以問文貞。文貞謂惟父所命。盜躍起曰。公子言如此。事諧矣。於是爇紅燭。設厚宴。讌文貞父子。及其族人。族人卽強兆慶領文貞行。父子禮時。金梁與其婦已高坐廳事。下鋪紅氍毹矣。兆慶無奈行之。金梁受禮後。復出其所生子。與文貞相見。盜子少。文貞僅一歲。亦白皙文雅。不類綠林所產。酒闌。金梁命從者以肩輿送兆慶歸。留文貞偕返故地。與其子伴讀。並令文貞此後同以父稱。弗從。盜曰。翁在已從。何忽改也。曰。父在從父。不在奚從。金梁怒。閉之暗室。日給一餐。使人覘之。文貞殊無苦。如是餓凍殘虐者十數日。而恬靜如恆。若弗覺也。其婦謂盜曰。我相此子骨幹厚。福命不淺。一切困苦。人固不忍。天亦不容。盍招其翁來。領之歸。卽以我子寄養。諺云。沒有強盜活八十。假有不幸。我子以同族關繫。或可藉延一線。春秋超薦。若敖之鬼。其不餒。

爾也。金梁然其說。越日。以東延兆慶來。領還文貞。末以撫領己子諄諄懇請。翁慨諾之。不數日。金梁卽統衆盜去。頻年秋末。胥有金餽兆慶。報撫子之德。兆慶皆峻却。一介弗受。未幾。金梁以案發伏誅。時文貞已得科名。曳朱紫矣。盜子以附文貞故。得免於禍。遂亦以安溪世其家。迄今安溪李族。其譜系中有另支附後者。卽盜裔也。

### 杭州宦族

杭州閥閱。徐氏之外。則有汪氏。汪氏在乾嘉間。極清華之盛。而學術亦一郡翹楚也。次爲許氏。許氏世居橫河橋。其先有爲粵督幕僚者。以平一大獄。活千餘人。自知當大其門。厥後果科第赫奕。一榜眼。一傳臚。其門嘗懸七子登科額。至爲幕僚者。卽學字輩之先德。嘗以學乃身之寶。儒爲席上珍。十字爲子孫命名次第。尙書乃普巡撫乃劍。其第二輩也。尙書庚身。其第三輩也。之寶二字輩。寡顯者。然科第未嘗絕。其有留居番禺者。後亦顯貴。尙書應駸。布政應鏐。是也。次爲吳氏。兩世宦蜀。而子修提學慶坻。炯齋侍講士鑑。父子入詞林。次爲高氏。高

氏世居雙陳巷。科名亦盛。家素封。好施。治家有法。自乾隆至宣統。家業未嘗稍替也。

### 杭州徐氏

杭州徐氏。自康熙間文敬文穆父子以科甲起家後。冠蓋相望。名德清門。著稱於浙。文敬公名潮。官至吏部尙書。文穆公名本。官至東閣大學士。文穆有弟杞。則任西安巡撫。有子以煊。則任內閣學士。他如翼燕。景憲。紹堂。紹基。曷。璋。亦皆奮迹科第。餘不悉數。且有以異途進者。如承恩之以監生官安徽巡撫。尤爲當時所僅見。及經咸同兵燹以後。戶口旣希。科第亦稍替。僅有印香。舍人名恩。綬。花農侍郎名琪。兩叔姪及舍人之子仲。可名珂者。登第未久。而且廢科舉矣。至其前於文敬文穆而爲士林所宗仰者。則曰元薦。以處州府教授。分校福建辛酉鄉試。信爲同考官中之向所罕有者也。

### 父子祖孫宰相

本朝父子調羹之盛者。指不勝屈。如阿文端公蘭。泰子爲傅文恭公明安。阿文

勤公克敦子爲阿文成公桂。張文端公英子爲文和公廷玉。劉文正公統勳子爲文清公墉。皆父子宰相。馬文穆公齊姪爲傅文忠公恆。文忠子爲福文襄王康安。高文良公斌子爲高文端公晉。文端子爲參政公書麟。溫文端公達孫爲溫相國福。福子相國伯勒保。尹文恪公泰子爲文端公繼善。孫爲相國慶柱。皆三代持衡。爲昇平良佐也。

### 兄弟子姪宰相

東武陳氏爲一邑鉅族。康熙朝。實齋相國清恪公以科第起家。其弟文洵。子文勤。相繼入閣。故時諺有一門三閣老。五部六尙書之稱。

文勤爲清恪側室所生。文勤通籍。生母尙未貶封。卽謝世。以側室不得由正門出喪。雖文勤力爭。未能通融。允行。最後。文勤乃言曰。將來我死。應由何門出喪。家人咸云。必出正門無疑。文勤乃躍登母柩。堅臥不起。卒由正門而出。文勤生母棄養時。清恪夫婦。久已安葬。是以文勤爲其生母別卜牛眠。第有母不可無父。因又爲清恪公鑄一金像。具衣冠。合葬於城東鄉之三水橋。俗稱爲金爺坟。

世爲河督

父子爲河督者。乾隆朝。錢塘吳嗣爵。嘉慶朝。子大學士璣。乾隆朝。錢塘姚立德。道光朝。子祖同復署總河。三世爲河督者。雍正朝。無錫相國稽文敏公曾筠。乾隆朝。文敏子相國文恭公璜。嘉慶朝。文敏公姪孫二泉承志。乾隆朝。漢軍李宏子奉翰。嘉慶朝。奉翰子亨特復任。叔姪爲河督者。雍正朝。長白相國高文定公斌。乾隆朝。文定姪相國文端公晉。

父子同官

王文靖公熙以順治丁酉擢宏文院學士。時文靖父文貞公崇簡。適任國史館學士。世祖曰。父子同官。古今所少。以爾誠恪。特加此恩。

曾李一門節鉞

同光間。漢人之一門節鉞者。以湘鄉曾氏合肥李氏爲最。曾氏則文正公國藩。忠襄公國荃。李氏則筱筌制軍瀚章。文忠公鴻章而外。又有猶子經羲。

端方家世

端方爲托活絡氏家世貴盛。其伯父正色立朝。有聲同光間。卽內務府大臣桂清也。桂於同治中任內務府大臣。能以法制裁抑近倖。羣小側目。爭齟齬之。乃謝病去。其同列文錫貴寶。始導穆宗微行。竟遇疾上仙。光緒初。某御史上疏言上方初政。內府爲本原之地。當遠小人。親君子。小人謂誰。則文錫貴寶是。君子謂誰。則前任大臣桂清是。其疏一出。傳誦徧都下。孝貞孝欽兩后乃褫文貴二人職。而溫旨起用桂。卒稱病不出。人益高之。端藉其餘廕。弱冠後。起家乙科。納資爲郎。分工部。六曹風氣。惟工部最腐敗。以所司無關軍國要計。滿洲世祿子弟。趨之若歸壑。車馬衣服酒食徵逐之外。無他好也。端在部。獨以博聞彊記。蹕厲風發。冠其曹列。不數載。遂躐登清檔房總辦。工部優差。皆遍歷之。當時輦下爲之語曰。六部三司官。大榮小那端老四。大榮爲浙江布政使榮銓。小那爲大學士那桐也。光緒戊戌之夏。端以京察一等。簡權霸昌道。於時德宗發憤變法。百廢俱興。端適以其時上疏。言考工事。上得疏。大稱賞。乃設農工商總局於京師。俾端領其事。開去道缺。加三品卿銜。同列二人。則吳京卿懋鼎。徐京卿建寅。

也。開局未幾。卽有八月之變。總局旋撤銷。端危疑甚。旋以他事獲解。自後孝欽后意始大愜。命以臬司候簡。未幾。授陝西按察使以出。

### 彭氏甲科傳家

長洲彭氏以科目稱於時。且以甲科傳家。最初者曰一庵。成順治十六年進士。至康熙十五年。南昫會試。廷對皆第一。南昫之孫芝庭。尙書亦中魁。是祖孫皆狀元也。芝庭之子紹觀。紹升。紹咸。孫希鄭。希洛。希曾。曾孫蘊輝。亦皆成進士。

### 同祖兄弟三十一人應試

桐城姚元之嘗於嘉慶朝奉命督學浙中。按部湖州。歲試烏程。鈕氏廩增附與試者三十一人。皆同祖兄弟也。姚問送考教官。何如此之盛。答曰。除已登科出仕者外。本年大魁及拔貢入都朝考。皆同祖者。更詢以共若干人。答曰。八十餘。其祖生子八人。子之子或十餘。或八九。或七八不等。

### 兄弟翰林

灌陽唐氏薇卿。名景崧。文簡公名景崇。禹卿名景崱。爲同懷昆季。同治朝先後

入翰林。其封翁懋功猶應禮部試。屢下第。輒憤懣無已。每值考試。試差。封翁設几於門而坐焉。尼公子輩毋許赴試。恐其分校會闈。親父須迴避也。未幾。遇覃恩。膺誥命。封翁則盛怒。凡膺封誥者毋得鄉會試索大杖。杖三太史。亟走避。並浼鄉人數輩爲之再三緩頰。廬乃得免。

### 裴氏兩世以貲耶致貴

曲沃裴率度由附貢捐納主事。雍正間。官至江西巡撫。子宗錫。由監生捐納同知。乾隆間。歷撫安徽雲南貴州。兩世均以貲進也。

### 阮文達門聯

阮文達公元退歸後。初署門聯曰。三朝閣老。一代偉人。下句蓋敬錄天語。非自誇也。然文達終恐涉於炫耀。遂改對語爲九省疆臣。

### 珠子王家

京師隆福寺。每月九日。百貨雲集。謂之廟會。有王翁攜十歲幼孫往遊。孫見一紫檀界尺。愛之。強翁買歸玩弄。偶擊几上。劃然一小抽屜脫出。中藏東珠十枚。

翁狂喜。驟獲珠價。加以營殖。遂成巨室。都人呼為珠子王家。

### 金頭朱家

無錫朱氏。先世業農。偶掘地。得一人頭。乃金所鑄成。不知何代物也。古時武臣效命疆場

或喪其元。往往以重寶為首。配合軀體。禮葬。鑄金琢玉。皆有之。朱氏所得其殆是耶。朱氏因居積致富。族姓蕃蕃。號為金

### 頭朱家。

### 吳氏各房輪值典當

江西豐城白馬岩吳家。其所開典當之帳簿。以千字文編號。每月用一字。凡用千字文一周。則必大設酒食。請族人及諸司事會飲。已二百數十年矣。蓋吳氏祖制。凡當皆不得分析。每房以次輪值一月。周而復始。值月者以時促。不能虧空作弊。故久存也。

### 史可法孫

明史可法殉節時。尚無子。遺命以副將史德為之後。及雍正初。聊城鄧東長宗伯督學江左。時有童生年四十餘。視其卷。署祖名可法。詢之。即其孫也。蓋督師

赴揚。寄孥白下。有孕妾。滄桑後生一子。延史氏之脈。因家焉。鄧遍詢諸老生。對無異詞。閱其文。疵類百出。鄧曰。是不可以文論。錄之。邑庠。而刻石署壁。以記其事。是史閣部固有孫矣。

### 宋王之後

宋荔裳卒後。止一幼女。祝髮中山爲尼。名道啓。王漁洋裔孫某。當嘉道閒。在新城縣署爲皂隸。南昌諸生尙鎔賦詩哀之曰。當年赤幟樹騷壇。寶樹盈庭尙可觀。名盛久如明七子。孫微今似魯三桓。誰將斐豹丹書燕。曾使華泉後裔安。寒食不須頻上墓。鶴歸華表恨漫漫。

### 江焦之後

江慎修名永。婺源大儒也。其居處名江灣。地極秀異。而其裔設豆腐店。焦里堂名循。甘泉大儒也。其後人亦以賣餅爲生。或云。此亦公羊賣餅家。

### 熊賜履無子

熊文端公賜履。漢陽人。相聖祖。先後幾三十年。忠清剛介。崇尚理學。號爲賢相。